

KONTAKTO KU RUMANNAN

Lès 4

Ora bo a aseptá Kristo, bo a aseptá un Persona, no un religion. Bo a establese un relashon personal ku Dios. El a bira bo Tata. Bo a bira un di Su yunan (Juan 1:12). Ma bo tambe a haña hopi ruman nobo—tur esnan ku a konfia Kristo pa salba nan.

NOS TIN MESTER DI OTRO

Bo tin mester di kontakto ku otro persona ku a konfia Kristo pa salbashon. E rumannan aki por ta un yudansa grandi pa bo den bo bida nobo. Nan por yudábo konosé Dios mas mihó, konsehábo pa evitá ideanan ekstremo, i yudábo pone Dios Su Palabra na práktika. Ora bo no tin kontakto ku bo rumannan den Kristo, bo ta pèrdè hopi. Beibel ta menshoná hopi kos ku bo no por haña separá di bo rumannan. Kiko e siguiente tekstonan ta bisa ku rumannan den Kristo mester hasi un pa ku otro?

1. Romanonan 12:10 _____
2. Romanonan 15:5 _____
3. Romanonan 15:7 _____
4. Romanonan 16:16 _____
5. 1 Korintionan 12:25 _____
6. Galationan 5:13 _____
7. Efesionan 4:32 _____
8. Efesionan 5:21 _____
9. Kolosensenan 3:16 _____
10. 1 Tesalonisensenan 4:18 _____
11. Hebreonan 3:13 _____
12. Hebreonan 10:24 _____

13. Santiago 5:16 _____

14. 1 Pedro 3:8 _____

Tur esakinan ta kos ku bo no por haña separá di bo rumannan. Klaramente e kontakto stimulanté aki ku rumannan den Kristo ta hopi importante. Nos tin mester di otro!

KIKO DI SIRBISHINAN?

E promé iglesia, esun na Herusalèm, a reuní tur dia i tabata krese konstantemente den kantidat segun Echunan 2:41-47. Echunan 2:42 ta lista kuater kos ku nan a hasi—kuater bendishon ku bo lo pèrdè si bo keda sin reuní ku otro ruman den Kristo:

1. _____
Un parti importante di e sirbishi ta e tempu ku bo por haña siñansa mas profundo for di Palabra di Dios. Ta masha importante pa studia Skritura huntu pa bo sa kiko bo mester kere i kon bo mester biba.
2. _____
Na sirbishinan bo tin komunion ku hopi ruman den Kristo. Bo ta enkurashá ku bo no ta bo so. Esun ku ke biba pa Dios su so ta manera un kiper sin tim, un tokadó di raspu sin banda, un soldá sin ehersito. Ta kasi impusíbel bo so.
3. _____
Na sirbishinan nos ta adorá i alabá Dios huntu pa Su Persona, Su Palabra, i Su echunan. Sena di Señor ta rekordá nos di Dios Su obra maravioso ora El a salba nos!
4. _____
Na sirbishinan, orashon huntu ta fortifiká i enkurashábo. Tin oportunidat pa hasi orashon pa nesesidatnan spiritual, físiko, emoshonal, sosial, èts. di un i otro.

Difísilmente bo por tin kontakto personal ku bo rumannan den Kristo tur dia. Ma nan a kumbiní pa reuní huntu na siertu sitio, siertu dia, i siertu ora. Bo tin mester di e kontakto fortifikante aki. Kiko ta e mandamentu den Hebreonan 10:25?

Un persona ku no ta reuní ku su rumannan den Kristo ta manera un karbon korá saká for di kandela. Djis e ta kuminsá fria i ta bira dòf.

KIKO TA IGLESIA?

Dios a establese tres institushon riba mundu: famia, gobièrnu, i iglesia. Ni famia ni gobièrnu ta un edifisio. Igualmente, iglesia tampoko ta un edifisio. Di bèrdat, iglesia ta **hende** ku a konfia Kristo Hesus komo nan Salvador personal. Pues, e edifisio ta solamente e lugá unda iglesia ta reuní.

Kiko Beibel ta yama iglesia segun 1 Korintionan 12:27?

Segun Efesionan 5:23, ken ta Kabes di iglesia? _____

GUIANAN PA SKOHE UN IGLESIA

Si bo a aseptá Kristo komo Salvador i bo ta asistí na un iglesia ku no ta bíblikamente na òrdu, bo ta manera un hende ku un bòter di awa kanando den desierto. Poko poko bo reserva lo kaba. Pa bo por krese spiritualmente, bo mester skohe bo iglesia ku kuidou. Investigá e siguiente puntonan promé ku bo ta skohe un iglesia:

1. Averiguá e iglesia su kreensia tokante Beibel. E iglesia ta kere ku tur 66 buki di Beibel—ningun mas—ta Palabra di Dios inspirá, ta sin eror, i ta yena tur nesesidat pa konosementu spiritual di e kreyente?
2. Averiguá e iglesia su kreensia tokante Kristo. Un iglesia ku ta hasi Hesus ménos ku Dios ta falsu.
3. Averiguá e iglesia su kreensia tokante salbashon. Beibel ta siña ku salbashon ta bin pa medio di konfia den Kristo so, sin

hasi nada mas aserka. E no ta dor di hasi bon obra, kumpli ku sièrtu rito, ni dor di warda sièrtu regla.

4. Averiguá e iglesia su stèndèrt moral. Un iglesia ku no ta enkurashá moralidat òf ku no ta preokupá ku esaki, basta ku e miembronan ta asistí na iglesia, no ta bale la pena pa bo asistí na dje. Pasobra un iglesia mester demonstrá e karakter di Kristo den tur aspekto. Un iglesia mester aspirá pa ta santu.

Ma di otro banda, ta bon pa realisá ku no ta eksistí un iglesia perfekto. Iglesia ta manera un hòspital. Iglesia no ta yen di hende totalmente santu, deboto, i perfekto. Alkontrario, hende ku ta konsiente di nan nesesidat ta bin iglesia pa haña yudansa. Kada ruman den Kristo mester buska pa rekuperá den e área unda e ta enfermo i debil.

APLIKASHON

Yena tur e hòkinan ku ta kuadra pa bo:

- ___ Mi ta deseá pa bai iglesia
- ___ Bai iglesia ta algu nobo pa mi. Mi ta nervioso kiko lo sosodé
- ___ Mi a yega di bai un sirbishi, ma a keda desapuntá
- ___ Ta difísil pa mi bai iglesia pasobra _____

TAREA PA KAS

1. Pidi un líder di bo iglesia pa “kredu” di iglesia pa bo ta sigur kiko e iglesia ta kere i siña.
2. Hasi un estudio di e iglesia kamina bo tin kustumber di asistí a base di e kuater guianan pa skohe un iglesia.
3. Siña Hebreonan 10:25 for di kabes.
4. Promé ku e siguiente lès, konta e di 4 persona ku bo a aseptá Kristo komo bo Salvador personal.
5. Sigui fiel ku bo tempu ku Dios—sikiera 15 minüt—tur dia.
6. Lesa e siguiente lès i yena e kontestanan.